

# **Malueng teltelnga ako Jon i wat i 1 Jon Ritetong nge a 1 Jon**

Jon ako ini a Krai ile pakeke i wat malueng ake, na riong pulua ako i voth nge, i ranga ve ini riong ako i voth nge Panongpolong Sivenga ako Jon i wat mun i. Toko powe ninengare olemi ve, Jon i voth a epee a Esia ma i wat malueng ake a toko lemioongare nge ako o voth mun a epee aken. Jon i sis ve aro i pator toko lemioongare nge pamirealonga le apaltetongare (2:26) ako o ri ve, ur areko te thepol i ake ru a ulue na nir peti mun ini ur kerenga, na onir inga ini ur sivenga. Maken o ri mun ve, aro ve te oma vothung kerenga tomo nge nir peti kerenga, ur e avele. Na o ri mun ve, Krai Ioni i lo lelpot tel ini peti lamoko i rin. Pamirealonga le apaltetongare o ri venen aken, aveto Jon i mothongpot ole lemi rumong ako i venen aken. Na i ri ve, aro ve te oma vothung kerenga, aken te avsa a God ile patorong, (3:4) na i ri mun ve, God itutunre o kis inga vothung kerenga omanga avele. (2:28–3:12) Jon i sis rintet ve aro te es a pen lalanga lemi, ranga ve ako Jisas ome Itema a God o voth a pen lalanga nge. Riong aolonga ako i voth a malueng ake lemi i vene: Toko lemioongare aro o es ol a pen lalanga lemi. (1:5-7) Toko e avele i pavurvur aro i ri ve, ilemio a Krai nge, na rongan i kis inga vothung midenga omanga. Aveto toko e ako i nongal ol a God ile patorong, i kene i teo a God nge. (3:14) Na ur

aolonga ako i voth a God ile patorong i vene: Aro ar sagu pel naro lemiro nge a Jisas Kraiss ako ini a God Itun. (3:23) Jon i sis ve aro lemire nine ako ve, toko neneanga a Jisas (1:1; 4:2-3) ini a Mesaia, ini toko ako God i ateal i ve aro i el werer ile tokokoere, ako o apet mun i ve ini a Kraiss, (2:22; 5:1) na ini a God Itun. (2:23; 3:23; 4:9-10; 4:14-15; 5:5-13; 5:20) Na ienga inga i rin mo aro i opoal it mo aro i pamimi it. (5:4-8) Jon i sis ve aro lemire nine ako ve, aro te el mimiong ako aro ile vusonga avele, tova lemire nge a God Itun. (5:13)

## **Aro te es ol a pen lalanga lemi, na te mothong tova te nongal mideng esngare ole riong**

*(Vonge 1:1–3:10)*

*Riong ako i sung mimiong i velpol ol a pen lalanga.*

<sup>1</sup> Them wat nge toko ako ulue ake i velpol rongan na i voth tel lale. Na them nongpol ikei ako i leng leng, na them thepol i nge thekimem, na them the a i nge, na menimem i vugir mun i. Na ini toko ako ile riong i sung mimiong a tokokoere nge, na them panongpol thomu nge ile riong aken. <sup>2</sup> Na mimiong tepun aken i velpol ol a pen lalanga, ma them thepol i ma them ritet nge. Na them panongpol thomu nge toko aken ve ini mimiong ako aro ile vusonga avele kene tepun, ako nomenga i voth tomo nge Titemer a God, ma i velpol a them nge lale. <sup>3</sup> Na ur ako them thepol i, na them nongpol i, aken them panongpol mun thomu nge, mo ako thomu o pavurvur mun aro

o supo tomo nge them nge titeinpeling a menong, na ler titeinpeling a menong aken i voth tomo nge Titemer a God na Itun a Jisas Kraiss. <sup>4</sup> Na them wat riong ake a thomu nge mo lemira i vual rintet nge lemi sivengaing.

*Aro te es inga a pen lalanga lemi.*

<sup>5</sup> Na riong ako them nongpol i a Jisas Kraiss nge, na them panongpol i a thomu nge, kene i vene: God ini pen lalanga na mideng e avele i voth a i nge. <sup>6</sup> Na aro ve te ria ve, te men titeinpeling tomo nge i, aveto rongan ler vothung i pathengal i ako ve, rongan te es a mideng nge, aken ler riong aken te ri nge, ini riong le apaltetonga, na te panes a God ile riong nunganga avele. <sup>7</sup> Na aro ve te es a pen lalanga lemi, ranga ve ako God i voth a pen lalanga nge, aken te men titeinpeling tomo nge a God ile tokokoere, na Jisas ako ini a God Itun ia mla i pariripot ol it nge ler vothung kerenga alavusnga.

<sup>8</sup> Na God i ri lale ve, toko alavusnga o oma vothung kerenga, na aro ve te ria ve, ler vothung kerenga e avele, aken ler apaltet sivenger, na God ile riong nunganga i voth a it nge avele. <sup>9</sup> Aveto aro ve te pamilempot ler vothung kerengare, aken God aro i panes ile riong ako i kin tomo i nge it lale, nara i oma vothung vengvenga a it nge, ako aro ilemi simikal ler vothung kerenga areken, nara i pariri ol it nge ler vothung alavusnga ako i vengvenga itheki avele. <sup>10</sup> Na aro ve te ri ve te oma vothung kerenga e avele, aken te apet a God ini toko le apaltetonga, na God ile riong i voth a ler mimiong nge avele.

## 2

### *Krais ini ler opoalinga.*

<sup>1</sup> Na tutukre, tho wat riong ake a thomu nge, mo aro o oma vothung kerenga avele. Aveto aro ve omu e i oma vothung kerenga, kimer mitnga ake ro i voth ako i ri nge it ako a Titemer a God itheki, ini a Jisas Krais, ako ini toko vengvenga.

<sup>2</sup> Na i sungpot isivenga ile mimiong ako nge ler vothung kerenga eltetpotnga. Na i oma venen aken nge enger inga avele, aveto i oma mun i nge toko alavusnga ake ru a ulue, ole vothung kerenga eltetpotnga mun.

*Toko ako ilemi mire senu nge ur ako God i sis ve aro i oma i, aro i panes mun i.*

<sup>3</sup> Na aro ve te panes a God ile patorongre, aken lemir mire ako ve, lemir mire senu nge ur ako i sis ve aro te oma i. <sup>4</sup> Na aro ve toko e i ri ve, “Lemik mire senu nge ur ako God i sis ve aro tho oma i.” Aveto i panes a God ile patorong alavusnga avele, toko aken ini toko le apaltetonga, na God ile riong nunganga i voth a i nge avele. <sup>5</sup> Aveto aro ve toko e i panes senu a God ile riong, aken ile asaguong nge a God i alarorol a ile mimiong. Na lemir mire ako te teo a God nge vene: <sup>6</sup> Toko e ako i ri ve i teo a God nge, aro ile vothung i ranga ve ini a Krais ile vothung.

<sup>7</sup> Na titeik sivengare, ine patorong ake ru tho wat i a thomu nge i ponganga avele. Aveto ini patorong neginga ako thomu o nongpol i nomenga vet ako me i patea nge ako o elo a Krais a lomumu. Na patorong neginga aken ini riong ako thomu o nongpol tel i lale, ako aro omu sagu pel.

<sup>8</sup> Aveto patorong aken ako tho wat i a thomu nge i ponganga mun a thomu nge, na o thepol i a lomu mimiong ranga ve ako ini a Krai ile mimiong. Na o thopol i a lomu mimiong, eneke mideng a esong i penthalu, na pen lalanga a esong i velpol lale ma i to ol.

<sup>9</sup> Na aro ve toko e i ri ve i voth a pen lalanga, aveto rongan ini silal itein lemioonga e, aken toko aken rongan i voth a mideng nge. <sup>10</sup> Na toko ako ia sagu ititein lemioongare, aken i voth a pen lalanga, na ur e avele i voth a i nge ako aro i pamatu i. <sup>11</sup> Aveto toko ako ini silal itein lemioonga e, aken i voth a mideng nge, na rongan i es a mideng lemi, na ilemi mire nge wop kathnga ako i es nge, kene avele, eneke mideng rongan i pasopal itheki.

<sup>12</sup> Na rongan tho wat riong ake a thomu tutukre ako ini a Krai ile,  
eneke ako nge a Krai inga, God i eltetpot lomu vothung kerenga.

<sup>13</sup> Na rongan tho wat riong ake a thomu a vovoengae mun re nge, ako lomu lemioong i motu, eneke lomumu mire senu nge a Krai ako i voth evelelnga.

Na rongan tho wat riong ake a thomu apoapongare nge, ako lomu lemioong i engeng,  
eneke lomu mong a Satan, ako i kerenga selele lale.

Na i nunganga ako tho wat lale a thomu tutukre ako ini a Krai ile,  
eneke lomumu mire senu nge Titemer a God.

<sup>14</sup> Na tho wat lale a thomu a vovoengae mun re nge, ako lomu lemioong i motu,

eneke lomumu mire senu nge a Krai ako i  
voth evelelnga.

Na tho wat lale a thomu apoapongare nge, ako  
lomu lemioong i engeng,

eneke thomu o engeng, na God ile riong i  
mimi a lomumu, na lomu mong a Satan,  
ako i kerenga selele lale.

*Te mothong tova ar sagu vothung ulue anga.*

<sup>15</sup> Thomu o mothong tova omu sagu vothung  
ulue angare, eve ur areko i voth mun nge. Eneke  
aro ve omu e ia sagu vothung ulue anga, aken  
God iasagunga i voth a i nge avele. <sup>16</sup> Na i venen  
aken, eneke vothung alavusnga ako ini toko ulue  
angare ole, i es a Titemer a God nge me avele,  
ranga ve ini ako o panes inga vothung areko  
i mita a olemi me, na o theseal, na o magon.  
Vothung alavusnga areken ini vothung ulue anga  
vet aken. <sup>17</sup> Na ine ulue ake tomo nge areko oa  
sagu vothung ulue anga aro o vus, aveto tokokoe  
areko o oma ur areko God i sis ve aro o oma i, aro  
ole mimiong aro ile vusonga avele.

*Krais ile ngarangre o velpol lale.*

<sup>18</sup> Na tutukre, te tohtunal ol nang le vusonga  
lale. Na ranga ve ako o nongpol ako ve, Krai ile  
ngarang aro i es me, na ponange ol ake Krai ile  
ngarangre pulua o velpol lale. Na nge aken, lemira  
mire ako ve, te tohtunal ol nang le vusonga. <sup>19</sup> Na  
tokokoe areken nomenga o voth tomo tel nge it,  
lama o lo lelpot ar ma o es. Aveto or ini lernga  
nunganga avele. Eneke aro ve or ini lernga, aro  
rongan o voth tomo nge it. Aveto o lo lelpot ar  
lale, make i nunganga ako ve, or ini lernga avele.

<sup>20</sup> Aveto thomu o el Oni Riringa lale ako a Toko Riringa nge me, na i panine lomumu mo ako lomumu mire nge riong nunganga ako God i pathengal i a it nge. <sup>21</sup> Ava lomumu ve tho wat a thomu nge, eneke lomumu mire nge riong nunganga avele, aveto avele. Tho wat a thomu nge, eneke lomumu mire nge riong nunganga lale, na lomumu mire mun ako riong nunganga i pavelpol riong le apaltetonga e avele. <sup>22</sup> Toko le apaltetonga ini anga? Ini toko ako i kelelal ve, Jisas ini toko ako God i ateal i ve aro i el werer ile tokokoere, kene avele. Na toko ako i venen aken, ini a Krai ile ngarang. Ma i lel ikime nge Titemer a God na Itun a Jisas. <sup>23</sup> Na toko ako i lel ikime nge a God Itun aken, akennga i lel mun ikime nge Titemer a God. Na toko ako ilemio nge a God Itun, akennga i lemio mun nge Titemer a God.

*Oni riringa i pamireal it nge riong nunganga.*

<sup>24</sup> Na riong areko thomu o nongpol i nomenga nomenga vet ako me i patea nge ako o elo a Krai a lomumu, kene aro thomu o krim engeng i. Na aro ve thomu o krim engeng inga, aken rongan o teo a Jisas nge na a Titemer a God nge. <sup>25</sup> Na ake ini ur ako i kin ile riong a it nge lale ve aro i sungu mimiong ako aro ile vusonga avele a it nge.

<sup>26</sup> Na tho wat riong areken a thomu nge mo tho pator lomu nge tokokoe areko o tongporum ve aro o paleklek thomu. <sup>27</sup> Aveto thomu o el Oni Riringa a God nge me, na rongan i voth a lomumu, make o mothong tova o sis ol pamirealinga e, eneke Oni Riringa ienga inga ako i pamireal thomu nge ur alavusnga. Na Oni Riringa aken ile

omaing i nunganga na ile apaltet avele. Maken aro thomu o kis inga lomu teong a Krai nge ranga ve ako Oni Riringa i pamireal thomu nge.

*Na ponange te voth ol ini a God itutunre.*

<sup>28</sup> Na tutukre, aro thomu o pesrou avele nge lomu teong a Krai nge, moro aken nge nang ako aro i velpol a pen lalanga, aro te mit engeng, naro ler mara nge mitong a itheki avele, ako nge ile esuong me.

<sup>29</sup> Na lomumu mire ako ve, Krai ile vothung alavusnga i vengveng rintet, aken aro lomumu mire mun ako ve, toko alavusnga ako o oma vothung vengvenga, or ini a God itutunre ol lale.

### 3

<sup>1</sup> O, ken! O thepol vet Titemer a God ile asaguong aolonga ako i sungu i a it nge, make i apet it ini itutunre ol! Na i nunganga ako it ini a God itutunre ol! Aveto toko ulue angare o ate it ve ini itutunre avele, eneke olemi mire nge a God avele. <sup>2</sup> Na titeik sivengare, te voth ol ini a God itutunre, aveto ler mimiong panen anga aken o panine mos i a it nge rongan. Aveto lemir mire ako ve, panen tova Jisas i velpol, aro te velpol ranga ve ini mun i i, eneke aro te thepol i ako ve, i kene ini a God. <sup>3</sup> Na toko alavusnga ako o men sial tomo nge ole lemioong nge ur aken, o oma inga vothung riringa mo o riri ranga ve ako Krai i riri.

<sup>4</sup> Na tokokoe areko o mosal inga nge vothung kerenga omanga, o avsa a God ile patorong. Na i nunganga ako vothung kerenga omanga ini vothung ako i avsa a God ile patorong. <sup>5</sup> Aveto



lomumu mire ako ve, Krai i velpol mo ako aro i eltetpot ler vothung kerenga areken. Na vothung kerenga e avele i voth a i nge. <sup>6</sup> Na aro ve toko e i teo a Krai nge, aro i mos ol nge vothung kerenga omanga ol avele. Aveto aro ve toko e i mosal inga nge vothung kerenga omanga, aken lemire mire ako ve, ilemi mire nge a Krai avele, na i elo i a ilemi rongan.

<sup>7</sup> Na tutukre, aro thomu o naktet thomu, aro vene mo toko e aro i paleklek thomu. Na toko ako i mosal inga nge vothung vengvenga omanga, ini toko vengvenga ranga ve ini a Krai ako ini toko vengvenga. <sup>8</sup> Na toko ako i mostun inga nge vothung kerenga omanga ini a Satan ile, eneke nomenga vet ako me i patea nge ur alavusnga patenga, Satan i mosal inga nge vothung kerenga omanga. Na tepun ako God Itun i velpolu ake, mo aro i pakerenga a Satan ile omaing. <sup>9</sup> Na toko ako i velpol ini a God itun lale, aro i mos ol inga nge vothung kerenga omanga avele, eneke God ile mimiong i voth a i nge, na i pavurvur aro i panes ol vothung kerenga avele, eneke i velpol ini a God itun lale. <sup>10</sup> Naro lemire mire nge toko kathnga ako ini a God itun, na toko kathnga ako ini a Satan itun kene vava? Toko e ako i oma vothung vengvenga avele eve ia sagu ititeinre avele, aken ini a God itun avele.

## **It omole omole aro ar sagu tokokoere**

*(Vonge 3:11–5:21)*

*I sivenga ako aro ar sagu pel.*

<sup>11</sup> Na riong e ako thomu o nongpol i nomenga vet ako me i vene: Aro ar sagu pel. <sup>12</sup> Na te mothong tova it ranga ve ini a Kein, ako ini a Satan ile toko, ako ini silal itein, mako i so rin i. Na i vava ako i so rin itein, e? I so rin i, eneke ini silal i, eneke isivenga ile vothung i kerenga, na itein ile vothung i vengveng. <sup>13</sup> Na titeikre, aro ve toko ulue angare oni silal thomu, aken aro o mothong tova o kukuk nge. <sup>14</sup> Na lemire mire ako ve, te lo lelpot rinong lemi lale, na te es ol a mimiong lemi, eneke ar sagu titeir lemioongare. Na toko e ako ia sagu avele, rongan i voth a rinong lemi. <sup>15</sup> Na toko e ako ini silal itein lemioonga e, aken ini toko ako i so rin toko ako a God itheki. Na lomumu mire ako ve, toko ako i so rin toko, mimiong ako aro ile vusonga avele, kene i voth a i nge avele.

<sup>16</sup> Na lemire mire nge ako asaguong ini vothung le vanga, e? Eneke Jisas Krai i sungpot isivenga ile mimiong, mako i rin mo ako aro i opoal it. Na ile vothung aken i pathengal it nge vothung ako nge asaguong. Na it mun aro te sungpot mun sivenger ler mimiong mo aro i opoal titeir lemioongare. <sup>17</sup> Na aro ve toko lemioonga e ako ile ur elonga i voth, na i thepol itein lemioonga e ako i oror nge ur e, na aro ve i opoal i avele, aken lemire mire ako ve, God ile vothung ako nge asaguong i voth a i nge avele. <sup>18</sup> Na tutukre, te mothong tova ar sagu titeir lemioongare nge riong inga nge wor, aveto aro te opoal or nge ur pelie ako o oror nge, ako ranga ve God ile riong nunganga i ri nge.

*It toko lemioongare aro te mit engeng a God*

*itheki.*

<sup>19</sup> Na aro ve ar sagu titeir lemioongare venen aken, aken lemire mire ako ve, te voth a God ile riong nunganga lemi. Na nge aken te pavurvur aro te ngeip nge mitong a God itheki avele. <sup>20</sup> Na aro ve opor lemi i teltun ar nge ur pelie, ur e avele, eneke God i aolonga nge ur areken i voth a opor lemi, na ilemi mire nge ur alavusnga ako ru i voth a it nge. <sup>21</sup> Na thomu areko ok sagu thomu, aro ve opor lemi i teltun ar avele, aken aro te mit engeng a God itheki, <sup>22</sup> naro te el ur kathnga ako te nong i a i nge, eneke te panes ile patorong, na te oma vothung ako ilemi sivenga nge. <sup>23</sup> Na ile patorong i vene: Aro lemiro nge Itun a Jisas Kraiss, naro ar sagu pel ranga ve ako i tor ler nge. <sup>24</sup> Na aro ve toko e i panes a God ile patorong, aken i teo a God nge, na God i teo mun a i nge. Na lemire mire ako God i teo a it nge vava? Eneke Ioni Riringa ako i sungu i a it nge kene i pathengal it nge ler teong aken.

**4***Aro te tongporum vet panongpolong elonga ako i es a God nge me eve avele.*

<sup>1</sup> Na titeik sivengare, riong elnga le apaltetonga pulua o esu esa a pen elonga, ma o panongpol. Na o mothong tova lomumuo nge toko alavusnga ako o ri ve, God Ioni i voth a or nge, kene ole panongpolong. Aveto aro thomu o tongporum vet or nge ole panongpolong aken, ako i es a God nge me eve avele. <sup>2</sup> Naro thomu o ate nge a God Ioni vava, e? Aro thomu o nongpol senu nge ole panongpolong. Na aro ve o ri ve Jisas Kraiss i

velpol ini toko nunganga ake ru a ulue, aken ini toko ako God Ioni i voth a i nge. <sup>3</sup> Aveto tokokoe areko o oma riong ako i venen aken avele nge a Jisas, aken tamata le apaltetonga i voth a or nge, na o es a God nge me avele. O ranga ve ini a Krai ile ngarang ako nomenga o nongpol i ako ve, aro i es me, na ponange i velpol ol a ulue lale.

<sup>4</sup> Na thomu tutukre, thomu ini a God ile na lomu mong or lale. Eneke God Ioni ako i voth a thomu nge, kene ile engenging i aolonga rintet nge a Satan ako i voth a ulue ake, kene ile engenging. <sup>5</sup> Na o ri inga nge ur ulue anga, eneke o panes inga vothung ulue anga, make areko o panes vothung ulue anga o nongal inga ole riong. <sup>6</sup> Aveto it ako ini a God ile. Na areko olemi mire nge ur ako God i sis ve aro o oma i, aro o nongal ler riong. Aveto areko or ini a God ile avele, aro o nongal ler riong avele. Na nge vothung inga aken, te pavurvur ako aro te ate nge Oni Riringa ako i pavelpol riong nunganga, na tamata kerenga areko o pavelpol riong le apaltetonga.

*Aro ar sagu tokokoere, eneke God ia sagu tel it.*

<sup>7</sup> Na titeik sivengare, aro ar sagu pel, eneke vothung ako nge asaguong i es a God nge me. Na toko e ako ia sagu tokokoere, ini a God itun ako God i pavelpol mimiong ponganga a i nge, na ilemi mire senu nge ur ako God i sis ve aro i oma i. <sup>8</sup> Na toko e ako ia sagu tokokoere avele, aken ilemi mire nge ur ako God i sis ve aro i oma i, kene avele, eneke God ilemi alavusnga ini asaguong popepenga. <sup>9</sup> Na God i pathengal it ako ve, ia sagu rintet it, nge ako i pakeu Itun omolenga

aken, a ulue me mo i sung mimiong ako aro ile vusonga avele a it nge, ako nge ile rinong. <sup>10</sup> Na vothung ako nge asaguong kene i vava, e? Ini vothung ako ar sagu a God, kene avele. Aveto ini vothung ako God ia sagu it, mako i pakeu Itun aken me, mo i sungpot isivenga ile mimiong, ako nge ler vothung kerenga eltetpotnga. <sup>11</sup> Na titeik sivengare, God ia sagu it venen aken, mako i sivenga ako aro it mun aro ar sagu pel. <sup>12</sup> Na toko e avele i thepol a God. Aveto aro ve ar sagu pel, aken God i voth a it nge, na ile vothung ako nge asaguong i alarorol a it nge.

<sup>13</sup> Na lemire mire ako ve, te teo a God nge, na God i teo mun a it nge vene: Eneke i sungu isivenga Ioni a it nge. <sup>14</sup> Na te thepol ur ako God i oma i lale, ako ranga ve i pakeu Itun me, mo i velpol ini toko alavusnga ake ru a ulue ole Pamimionga, make te panongpol ol nge aken. <sup>15</sup> Na aro ve toko e i nutun ve, Jisas ini a God Itun, aken God i teo a i nge, na i teo mun a God nge. <sup>16</sup> Make ranga ve te thepol a God ile asaguong a it nge, na lemire nge ile asaguong aken.

God ilemi alavusnga ini asaguong popepenga. Na toko e ako i mimi a asaguong lemi, aken i teo a God nge, na God i teo mun a i nge. <sup>17</sup> Na aro ve te teo a i nge venen aken, vothung ako nge asaguong, kene i alarorol a ler mimiong, eneke it ranga ve ini a Kraisa ake ru a ulue. Na i venen aken, mako aro te mit engeng nge nang ako aro te mit nge riong a God itheki. <sup>18</sup> Na asaguong ako i venen aken, ngeipong i voth a lemi avele, eneke aro ve vothung ako nge asaguong i voth

engeng a toko e nge, aken i eltetpot ngeipong a i nge. Maken aro ve toko e i ngeip nge a God, aken ile asaguong nge a God i alarorol avele, eneke rongan i ngeip nge a God ve aro i paomelal i nge ile vothung kerenga.

<sup>19</sup> Na it kene ar sagu a God tomo nge tokokoere, eneke God ia sagu tel it a mukaling. <sup>20</sup> Na aro ve toko e i ri ve ia sagu a God, aveto ini silal itein lemioonga e, aken ini toko le apaltetonga, eneke toko e ako ia sagu itein avele ako i thepol i nge itheki, i pavurvur mun avele ako aro ia sagu a God ako i thepol i nge itheki avele. <sup>21</sup> Na patorong ako te el i a i nge, kene i vene: Toko ako ia sagu a God, aro ia sagu mun itein lemioongare.

## 5

*It toko lemioongare ler mong vothung ulue anga ile engeng.*

<sup>1</sup> Na toko alavusnga ako olemio ve, Jisas ini toko ako God i atéal i ve aro i el werer ile tokokoere, aken or ini a God itutun areko i pavelpol mimiong ponganga a or nge. Na toko alavusnga ako oa sagu Titemer a God, akennga aro oa sagu mun itutunre. <sup>2</sup> Naro lemír mire ako ve, ar sagu rintet a God itutunre vava, e? Eneke ar sagu a God na te panes ile patorong alavusnga. <sup>3</sup> Na aro ve ar sagu a God, aken aro te panes mun ile patorong alavusnga. Na ile patorong areken i pavurvur aro i sungu matheong a it nge avele. <sup>4</sup> Eneke it ini itutun areko i pavelpol mimiong ponganga a it nge, na ler mong vothung ulue anga. Na ler mong vothung ulue anga aken lale, ako nge ler

lemioong nge a God. <sup>5</sup> Na anga i pavurvur ako aro ile mong vothung ulue anga, e? Ini inga areko olemio ve, Jisas ini a God Itun.

*God i ritet nge Itun.*

<sup>6</sup> Na lemir mire ako ve, Jisas Kraiss ini a God Itun ako nge paatealing or aini.\* Na omole i velpol nge ako i es me ma i el paninuong nge thei. Na aininga i velpol nge ako ia mla i palalas a won ngoronga nge. Na lemir mire ako ve, Jisas ini a God Itun nge paatealing omole inga ako nge paninuong elnga, kene avele. Aveto lemir mire ako ve, ini a God Itun nge paatealing or aini, ako nge paninuong elnga tomo mun nge ia mla ako i palalas a won ngoronga nge. Na Oni Riringa mun kene i ritet mun it nge venen aken. Na lemiro nge ile riong aken, eneke ile riong alavusnga i nunganga inga. <sup>7</sup> Na ur or me aken o ritet ve, Jisas ini a God Itun. <sup>8</sup> Na ur or me aken ini Oni Riringa, paninuong, na ia mla, na or alame aken ole ritetong i thun inga. <sup>9</sup> Na i nunganga ako it tokokoere lemiro nge riong ako tokokoere o ritet it nge. Aveto riong ako God i ritet it nge, kene i mukal nge ole riong, eneke i es aken a God nge me, na ini a God ako i ritet it nge Itun. <sup>10</sup> Mako toko e ako ilemio nge a God Itun, aken i elo a God ile riong aken a ilemi lale. Aveto toko e ako ilemio nge a God ile riong avele, i ranga ve ako i apet a God ini toko le apaltetong, eneke ilemio avele nge a God ile riong ako i ri nge Itun. <sup>11</sup> Na riong nunganga ako God i ritet i a it

---

\* **5:6:** Lemir mire senu avele, aveto ava paatealing or aini ake kene i ri nge a God ikei ako i espot a Pen a Urvet me. O thepol a Matiu 3:17 and Jon 12:28.

nge lale kene i vene: God i sungu mimiong ako aro ile vusonga avele a it nge lale. Na mimiong aken tepun i voth inga a Itun nge. <sup>12</sup> Mako toko e ako i elo a God Itun a ilemi, ako nge ile lemioong nge i, aken i el mun mimiong ako aro ile vusonga avele a i nge. Aveto toko e ako i elo a God Itun a ilemi avele, aken mimiong ako aro ile vusonga avele, kene i voth a i nge avele.

*I pavurvur aro lemir mire ako ve, mimiong ako aro ile vusonga avele, kene i voth a it nge lale.*

<sup>13</sup> Na tho wat lek riong vene ake, na tho wat i a thomu areko lomumuo nge a God Itun, mo ako aro lomumu mire ako ve, thomu o el mimiong ako aro ile vusonga avele lale. <sup>14</sup> Mako te mit engeng a God itheki, eneke lemir mire ako ve, aro ve ler nongong i panes ilemi, aken aro i nongpol ler nongong aken. <sup>15</sup> Na aro ve lemir mire ako ve, i nongpol ler nongong aken, aken lemir mire mun ako ve, ur kathnga ako te nong i a i nge, kene aro i sungu i a it nge.

<sup>16</sup> Maken aro ve toko e i thepol itein lemioonga e ako i matu nge vothung kerenga, aveto vothung kerenga aken i pavurvur nge esuong a won sesenga nge avele, aken i sivenga ako aro i nong a God nge ve aro i opoal toko aken. Naro God i pavelpol werer ile mimiong ako i panes a Krai nge. Na tho ri inga ake nge tokokoe areko o oma vothung kerenga ako i pavurvur avele nge esuong a won sesenga nge. Ine vothung kerenga e ako i voth ako i pavurvur aro i paeso toko a



won sesenga nge.† Na tho ri ve aro thomu o nong nge toko ako i oma vothung aken, kene avele. <sup>17</sup> Ine vothung alavusnga ako i vengveng avele, ini vothung kerenga. Na vothung kerenga pelie ako i voth ako aro i paeso toko a won sesenga nge avele.

<sup>18</sup> Na lemir mire ako ve, toko alavusnga areko or ini a God itutunre ako i pavelpol mimiong ponganga a or nge, kene aro o mos ol nge vothung kerenga omanga ol avele. Aveto evelelnga God Itun i paseral ole, na Satan ako i kerenga selele, kene i pavurvur aro i pakerenga or avele. <sup>19</sup> Na lemir mire mun ako ve, it ini a God itutunre, aveto ulue alavusnga ake i voth a Satan ile engenging lemi. <sup>20</sup> Na lemir mire mun ako ve, God Itun i es me lale, na i sungu lemi rumong ninenga a it nge, mo ako aro lemir mire senu nge ur ako God nunganga i sis ve aro te oma i. Na te teo a God nunganga nge, ako nge ler teoong a Itun a Jisas Krai nge. Na Jisas Krai ini a God nunganga. Na ini mimiong ako aro ile vusonga avele kene tepun.

<sup>21</sup> Maken tutukre, aro thomu o voth melanga nge god le apaltetongare olotualnga.

Na i re aken. I vus.

---

† **5:16:** Toko powe ninengare o ri ve vothung kerenga ako i paeso toko a won sesenga nge i ranga ve ako o lel okime nge a God, eve oni silal a God itutunre, eve o apet a God ini toko le apaltetong.

**God Ile Riong Kinnga Ponganga nge  
Mangsengre Okei  
The New Testament in the Mangseng Language of  
Papua New Guinea  
Nupela Testamen long tokples Mangseng long Niugini**  
copyright © 1999 Wycliffe Bible Translators, Inc.

Language: Mangseng

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 11 Nov 2022 from source files dated 9 Oct 2020

65e1c726-2893-536b-a159-517869464e50